

Communicaziun a las medias

SPERRFRIST: 16-4-2025, 12.00h

Cuira / Turitg, ils 15 d'avrigl 2025

Dis da litteratura cun nova organisaziun en in nov lieu

Ils «Dis da litteratura», il pli grond e pli impurtant festival litterar rumantsch, han lieu il 1. ed ils 2 da november 2025 en la Postremise a Cuira. Il festival vegn purtà da l'Uniun per la Litteratura Rumantscha (ULR).

Suenter che l'entir comité dal festival è sa retratg per diversas raschuns personalas suenter l'ediziun dal 2024, n'èsi betg stà cler sche e co ch'il festival po cuntinuar. Ina discussiun animada e bleras propostas en il rom da l'ultima radunanza generala da la ULR sco uniun purtadra dal festival han mussà cleramain la spetga e pretensiun, che la suprastanza da l'uniun sorprendia fitg spert la responsabladad per il festival e tiria las decisiuns necessarias per garantir ses futur.

Analisa detagliada sco basa per decisiuns

La suprastanza da la ULR ha realisà ina analisa detagliada da las premissas e sfidas dal festival e fatg bliers discurs cun personas engaschadas ils ultims onns en il comité. Igl è sa mussà il cler basegn d'ina refurma organisatorica e dad evaluar novs lieus per l'occurrenza. Dad organiser in festival da talas dimensiuns en basa benevola, damai senza remuneraziun u cun remuneraziun simbolica, n'è oz betg pli pussaivel. La suprastanza n'ha chattà naginas personas prontas da sorprender las caricas en il comité dal festival. Da l'autra vart è er la finanziaziun dal festival ina gronda sfida. Bleras resursas personalas e finzials dovri per realisar las infra-structuras tecnicas, medialas e gastronomicas necessarias per in tal festival en ina halla polivalenta nua che talas n'èn betg avant maun.

Suenter discussiuns intensivhas ha la suprastanza decidì da realisar ils «Dis da litteratura» a partir dal 2025 en la Postremise a Cuira, ina instituziun culturala etablida ed averta per occurrenzas plurilinguas, ina instituziun che offra tut las infra-structuras tecnicas, medialas e gastronomicas necessarias per in bun pretsch. Ultra da quai ha la suprastanza decidì dad engaschar ina persuna cun in mandat pajà sco manadra da project. Diversas personas or da la scena litterara rumantscha e da la suprastanza èn stadas prontas da s'engaschar en ina gruppa da program che sustegna la manadra da project e la suprastanza tar la programmaziun e realisaziun dal festival.

Igl è donn da bandunar Domat

La suprastanza deplorescha fitg che questas decisiuns han per consequenza ch'il festival banduna la vischnanca da Domat ch'è stada ses lieu dapi sia fundaziun. Dapi l'emprima ediziun hai dà tant da la vischnanca politica sco da la vischnanca burgaisa da Domat in grond sustegn ideal, finzial ed infrastructural per il festival e gist la vischnanca burgaisa ha er contribuì a formats impurtants dal festival che han grond success ed ina vasta recepziun sco per exempel la concorrenza ed il premi Term Bel. Er autras uniuns localas sco l'Acziun Rumantscha Domat, la Societad da dunnas ed ils Tambours han contribuì dapi onns a la buna realisaziun

dal festival. La suprastanza da la ULR engrazia da cor a la vischnanca politica, a la vischnanca burgaisa ed a las uniuns da Domat per lur fidaivladad e lur sustegn. La suprastanza garantisce d'avair validità autamain en sia analisa per il futur dal festival sia colliaziun cun la vischnanca da Domat. Per la suprastanza è la conclusiun dentant stada clera ch'il festival po unicamain avoir in futur, sch'i gartegia d'evitar l'enorm sforz persunal, organisatoric e finanziel da stuair realisar in festival da talas dimensiuns en in lieu d'occurrentza senza installaziuns existentas.

Buna soluziun cun perspectives

La suprastanza è persuadida dad avoir chattà sin basa a l'analisa detagliada ina buna soluziun per l'organisaziun ed il lieu d'occurrentza dal festival che garantiscechan er ina perspectiva solida per in futur prosperaivel dal festival. La suprastanza s'allegra da preschentar e discutir questas infurmaziuns e decisiuns en il rom da la radunanza generala da la ULR ils 24 da matg a Cuir. Il program detaglià dal festival vegn publicità la fin da la stad 2025.

Las personas davos il festival 2025

La suprastanza exprima in grond engraziament a tuttas personas ch'èn s'engaschadas ils ultims onns per la buna realisaziun dal festival, surtut a las personas activas en il comité dal festival.

Per la realisaziun dals Dis da litteratura 2025 s'engaschan sper la suprastanza da la ULR (Manuela Balett, Flavia Hobi, Annatina Nay, Walter Rosselli, Rico Valär) la manadra da project Gianna Duschletta (autura, magistra) ed en la gruppa da program: Gianna Olinda Cadonau (autura, promotura), Viola Cadruvi (autura, scienziada), Nadina Derungs (editura), Walter Rosselli (translatur, autur) e Rico Valär (intermediatur).

Contacts

Manuela Balett, presidenta da la ULR, 079 461 23 36

Rico Valär, delegà da la suprastanza per ils DDL, 078 857 75 71